



## Operasaun Habelun: Reintegra ka Ameasa?

Mahein Nia Lian Nú. 80, 26 Juñu 2014



Foto: PNTL

Relatoriu Fundasaun Mahein Nia Lian ne'e suporta husi povu Amerikanu liu husi Ajénsia Estados Unidus ba Dezenvolvimentu Internasional (USAID) no Embaxada Finlandia iha Jakarta.

Vizaun husi autor sira ne'ebé expresa iha publikasaun relatoriu sira ne'e la representa vizaun husi Ajénsia Estados Unidus ba Dezenvolvimentu Internasional (USAID) no Embaxada Finlandia.



Website: [www.fundasaunmahein.org](http://www.fundasaunmahein.org)



## Konteudu Sira

<b>Konteudu sira</b>	<b>2</b>
<b>Introdusaun</b>	<b>3</b>
<b>Metodolojia</b>	<b>4</b>
<b>Komandu Operasaun Tatika no Postu Operasaun sira</b>	<b>4</b>
<b>Esperensia Operasaun Pasadu no nia Impaktu</b>	<b>5</b>
<b>Legalidade Operasaun</b>	<b>6</b>
<b>Impaktu husi Rezolusaun: “Operasaun Habelun”</b>	<b>8</b>
<b>Konkluzau</b>	<b>14</b>
<b>Rekomendasaun</b>	<b>15</b>
<b>Bibliografia</b>	<b>16</b>



## Introdusaun

Iha inisiu tinan 2014, Estadu Timor-Leste hasai rezolusaun importante rua maka rezolusaun Parlamentu Nasional Nú. 05/3/2014 ne'ebé hamosu “Operasaun 66” hodi fo autorizasaun ba Polisia Nasional Timor-Leste – PNTL halo atuasaun ba grupu Konsellu Revolusaun Maubere – KRM no Conselho Popular Defesa Repúblika Demokrátika Timor-Leste – CPD-RDTL.<sup>1</sup> Nune'e rezolusaun Konsellu Ministru Nú. 08/2014<sup>2</sup> fo autorizasaun ba FALINTIL- Forsa Defesa Timor-Leste – F-FDTL atu fo apoiu ba PNTL iha “Operasaun Habelun”.<sup>3</sup>

Bazeia ba rezolusaun Konsellu Ministru nian Governu estabelese Komandu Operasaun Konjunta – KOK nu'udar tutan husi “Operasaun 66”. Objetivu husi “Operasaun Habelun” ne'e atu bele re-integra fila fali situasaun siguransa comunidade hafoin rezultadu husi “Operasaun 66” ne'ebé konsege kria tensaun konfliktu entre membru grupu KRM no CPD-RDTL ho instituisaun Polisia Nasional Timor-Leste – PNTL.<sup>4</sup> Iha ne'ebé comunidade barak sai trauma no membru grupu KRM no CPD-RDTL balun halai ba foho Matebian.<sup>5</sup>

Realidade husi implementasaun “Operasaun Habelun” iha terenu la'os ho tipu atu reintegra comunidade. Maibe ho aprosimasaun militeristiku ne'ebé halo comunidade sira sai trauma no membru grupu KRM - CPD-RDTL hetan agresaun fiziku durante operasaun refere.<sup>6</sup> Iha ne'ebé sai preokupasaun públiku iha Timor-Leste kona-bá rezolusaun ne'ebé fo biban Governu hodi hamosu “Operasaun Habelun”.<sup>7</sup>

Relatoriu ida ne'e diskute kona-bá impaktu husi rezolusaun Parlamentu Nasional no Konsellu Ministru hodi aplika operasaun rua maka “Operasaun 66” no “Operasaun Habelun” inklui tatika no rezultadu husi operasaun refere. Ikus, pontu rekomendasaun husi FM ba Parlamentu Nasional no Governu.

---

<sup>1</sup> Parlamento Nacional. (2014). Hodi repudia tentativas ba instabilidade no ameagas contra Estado de Direito. Rezolusaun Nú. 05/3/2014.pdf.

<sup>2</sup> May. (2014, Maiu 08). FM Konsidera Rezolusaun PN Nakonu Ho “Game” Política. Media Diariu Nasional. Bele asesu mos iha link ne'e; <http://opinitimor.blogspot.com/2014/05/fm-konsidera-rezolusaun-pn-nakonu-ho.html>

<sup>3</sup> Fundasaun Mahein. (2014, Maiu 16). OPERASAUN KONJUNTA: Habelun ka Hatauk?. <http://www.fundasaunmahein.org/2014/05/16/operasaun-konjunta-habelun-ka-hatauk/>

<sup>4</sup> Moniz, Armandina & Ximenes, Lucia. (2014, Marsu 11). Operasaun ba CRM ho CPD-RDTL iha Laga, Membru PNTL 2 Kanek. <http://jornal.suara-timor-lorosae.com/operasaun-ba-crm-ho-cpd-rdtl-ih-laga-membru-pntl-2-kanek/>

<sup>5</sup> Tempo Semanal. (2014, Abril 02). Lere Husu KRM Lalika Uza Kilat A'at Koko F-FDTL. <http://www.temposemanal.com/seguransa-defesa/ler-husu-krm-lalika-uza-kilat-a-at-koko-f-fdtl>

<sup>6</sup> Fundasaun Mahein. (2014, Maiu 16). OPERASAUN KONJUNTA: Habelun ka Hatauk?. <http://www.fundasaunmahein.org/2014/05/16/operasaun-konjunta-habelun-ka-hatauk/>

<sup>7</sup> Sequiera, J & Santos, J. (2014, Abril 23). Husi Operasaun Konjunta ba CRM no CPD-RDTL, Fongtil Husu PNTL no F-FDTL Hatudu Nafatin Profesionalismu. <http://jornal.suara-timor-lorosae.com/husi-operasaun-konjunta-ba-crm-no-cpd-rdtl-fongtil-husu-pntl-no-f-fdtl-hatudu-nafatin-profesionalismu/>



## Metodologia

Iha estudu ida ne'e uza metodu diskusaun ho metodu *Security Sector Discussion* – SSD. Halo entrevista ba comunidade, membru KRM no CPD-RDTL, peritu legal nomos dokumentu husi rezolusaun Parlamentu Nasional no Konsellu Ministru, publikasaun media nasional, Konstituisaun RDTL, Kodiku Penal no relatoriu direktus umanus nian husi Organizaun Lokal no Internasional nian kona-bá “Operasaun Habelun”. Inklui halo observasaun direta ba area operasaun iha Sub-Distriu Laga, Baguia no Quilecai iha Distritu Baucau.

Relatoriu ida ne'e la'os atu dezafia polítika Estadu nian hodi garante estabilidade iha rai laran liu husi estabeselementu operasaun. Maibe halo análiza ba impaktu sira husi “Operasaun Habelun” ba siguransa nasional, hodi kria espasu ba debate públiku kona-bá polítika operasaun ne'e rasik.

## Komandu Operasaun Tatika no Postu Operasaun sira

Depois “Operasaun 66” ne'ebé ezejuta husi PNTL hodi halo atuasaun ba grupu KRM no CPD-RDTL iha lora 5 fulan Marsu 2014, Governu liu husi Konsellu Ministru aprova mos rezolusaun ida hodi fo autorizasaun ba F-FDTL atu apoiu PNTL liu husi “Operasaun Habelun”. Seremonia lansamentu “Operasaun Habelun” F-FDTL ho PNTL iha Kuartel Komponente Terestre F-FDTL Baucau, iha lora 09 fulan Abril 2014.<sup>8</sup>

KOK lidera husi Primeiru Komandante Operasaun Tatika Tenente Koronel, Manuel Freitas “Maubuti” no Segundu Komandante maka Superintendenti Polisia, Agostinho Gomes.<sup>9</sup> Iha ne'ebé postu Operasaun Tatika sentral koloka iha Kuartel Jeral Komponente Terestre F-FDTL Baucau hodi halo planu estratejia, kordena apoiu lojistika no administrasaun ba informasaun hotu-hotu durante operasaun.<sup>10</sup>

Tuir monitorizasaun FM identifika katak durante “Operasaun Habelun” KOK estabese postu 1 iha Sub-Distriu Laga Suku Lalulai, postu 2 iha Sub-Distritu Baguia, Suku Osso-Huna no Suku Samalari, no postu 1 iha Sub-Distritu Quilecai, Suku Lacoliu.<sup>11</sup> Husi postu ne'ebé kolokadu iha Fundasaun Mahein (FM) tenta hasai fotografia ruma maibe KOK la autoriza. Nune'e mos comunidade sira hato'o katak sira hetan presau husi KOK la bele fo informasaun ba públiku kona-bá prezensa KOK nian no atuasaun sira husi KOK. Ida ne'e la'os ona habelun maibe hatauk no hanesan funu boot ida iha area refere ka “Area Operasaun Militar”.

---


<sup>8</sup> Tempo Semanal. (2014, Abril 10). Longuinhos Husu FDTL Ho PNTL Obriga Ema Kumpri Lei. <http://www.temposemanal.com/nasional/longuinhos-husu-fdtl-ho-pntl-obriga-ema-kumpri-lei>

<sup>9</sup> May. (2014, Abril 25). Grupu CPD-RDTL 69 Entrega A'an Ba KOK. Media Diariu Nasional. <http://www.jndiario.com/2014/04/25/grupu-cpd-rdtl-69-entrega-aan-ba-kok/>

<sup>10</sup> Informasaun ne'e FM rekoilla durante halo monitoring iha Distritu Baucau. Koko dala-barak husu informasaun ba Komandante sira iha postu operasaun kona-bá rezultadu husi “Operasaun Habelun” maibe FM la bele hetan informasaun tanba ho razeun segredu Estadu.

<sup>11</sup> Fundasaun Mahein hetan defikuldade hodi hetan numeru (total) membru KOK ne'ebé kompostu husi F-FDTL no PNTL iha postu hirak ne'e tanba FM susar atu hetan dadus husi KOK.

## Mapa Postu “Operasaun Habelun”



Fontes: Rezultadu Peskiza FM, 2014.

### Esperiencia Operasaun Pasadu no Operasaun 2014

Hahu rai ida ne'e hetan ninia independensia, Estadu Timor-Leste husik ona historia operasaun sira ne'ebé bazeia ba rezolusaun. Hahú kedas husi “Operasaun Halibur” iha krize 2006,<sup>12</sup> “Operasaun Ninja” iha 2010, “Operasaun 88” iha 2011, Operasaun Rasa no “Operasaun Siklu Sosial” iha Welaluhu (2013).<sup>13</sup> Iha ne'ebé mai husi politika rezolusaun husik hela fitar (notas mean) iha komunidade relasiona ho atuasaun membru KOK ne'ebé ho milíteristiku.<sup>14</sup>

Esperiencia dahuluk liu Operasaun Halibur iha tinan 2008 involve militar ho polísia atua hasoru grupu armadu seluk ne'ebé halai sai husi instituisaun F-FDTL no PNTL. Iha ne'ebé operasaun la'o susesu no reintegra petiisonariu sira ba komunidade maske rejista insidenti kiik balu durante operasaun. Ida ne'e iha sirkuntasia ketak ida, iha ne'ebé grupu armadu sira ne'e tenta oho Prezidenti Repúblika no atake hasoru konvoi Premeiru Ministru nian iha dalan.

Operasaun seluk, “Operasaun Ninja” iha Covalima komunidade barak trauma no senti ladun seguru durante operasaun. Tanba, membru KOK halo pasa-revista ba komunidade nia uma iha tempu kalan halo agresaun fíziku hasoru sira no involve militar iha operasaun ne'e rasik.<sup>15</sup> Nune'e mos iha “Operasaun 88” membru KOK halo kapturasaun ema hamutuk 38 maibe husi total ne'e balun ema inosente.<sup>16</sup>

<sup>12</sup>Agi. (2008, Marsu 14). Barisan depan Operasi Salsinha Lolos Dari Kepungan 460 Pasukan KOG. Media STL. <http://groups.yahoo.com/neo/groups/east-timor-studies/conversations/topics/16037>

<sup>13</sup> Tempo Semanal. (2014, Abril 04). Operasaun 66 Susesu Hapara Grupus Ilegais. <http://www.temposemanal.com/seguransa-defesa/operasaun-66-susesu-hapara-grupu-ilegais>

<sup>14</sup> Lariwa. (2011, Maiu 2011). FM Kritika Politika Operasaun PNTL. <http://cjitlnoticias.sapo.tl/nasional/fm-kritika-politika-operasaun--81707>

<sup>15</sup> Viana, Rui. (2010, Febreiru 15). Kondisaun Direitu Umanus iha Covalima no Bobonaro. Relatoriu HAK. Bele asesu mos iha link ne'e; <http://www.laohamutuk.org/Justice/HAKHRCovaBoboFev10Te.pdf>

<sup>16</sup> Fundasaun Mahein. (2010, Agostu 10). Saida Mak Operasaun Ualu-Ualu (88)?. <http://fundasaunmahein.wordpress.com/2011/08/10/saida-mak-operasaun-ualu-ualu-88/>



Nune'e Operasaun Rasa no "Operasaun Siklu Sosial" iha Welaluhu – Manufahi tinan 2013 ne'ebé involve mos militar iha operasaun ne'e hodi atua grupu CPD-RDTL ne'ebé organiza serbisu kooperativa iha Welaluhu ho fardadu militar nian. Iha ne'ebé comunidade sira sente la seguru ho prezensa grupu CPD-RDTL no okupa rai abandonadu balu.

Situasaun sira ne'e kontinua akontese durante "Operasaun Habelun" nu'udar tutan husi "Operasaun 66" ne'ebé to'o ohin loron sai preokupasaun públiku. Tanba, liu husi rezolusaun Parlamentu Nasional no Konsellu Ministru hodi fo autorizasaun ba F-FDTL no PNTL iha terenu halo comunidade senti trauma no la seguru. Komunitade balun ne'ebé involve iha grupu KRM no CPD-RDTL balun to'o agora seidak fila ba nia uma no sei subar iha foho Matebian tanba senti ameadu.<sup>17</sup> Iha ne'ebé operasaun ne'e hetan kritika husi organizasaun sosiedade sivil sira durante no depois operasaun.<sup>18</sup>

Konklui katak operasaun la'os solusaun diak ba siguransa nasional ka povu ne'ebé ameadu. Maibe ho meius operasaun ne'e aumenta presan iha situasaun siguransa comunidade nian. Ida ne'e bele hamosu presedente aat iha futuru wainhira buat ki'ik no boot Estadu uza deit operasaun hodi reintegra situasaun siguransa ne'ebé identiku hanesan Nasaun otoritariu ka militeristiku, ne'e sorin ida.<sup>19</sup>

Iha sorin seluk, tanbasa sempre involve militar? Operasaun Halibur tinan 2008 iha sirkuntansia ketak ida iha ne'ebé hasoru grupu armadu ida. Situasaun sira tuir mai iha Operasaun Ninja, Operasaun 88, Operasaun Rasa no Operasaun Siklu Sosial, Operasaun 66 inklui Operasaun Habelun involve mos militar maske la iha ameadu militar ruma husi situasaun sira ne'e no hamosu postura operasaun ida militeristiku.

Postura operasaun militeristiku ida ne'e dudu sees tiha misaun PNTL lolos ne'ebé responsabiliza ba siguransa interna no hamihis tiha karakter PNTL nian polisia komunitaria. Iha ne'ebé iha situasaun sira ne'e presiza aprosimasaun polisiamentu komunitaria. Portantu problema nia natureza sei kait ho problema sosial, ekonomiku sira no sei kait problema veteranus nian iha ne'ebé presiza komponenti tomak Estadu nian hodi solusiona la'os ho militar.

### **Legalidade Operasaun**

Iha loron 3 fulan Marsu 2014, momentu ida importante ba Parlamentu Nasional – PN aprova projeitu rezolusaun husi Governu atu fo autorizasaun ba militar no polisia hodi halo atuasaun ba grupu KRM no CPD-RDTL. Tanba konsidera nu'udar grupu ilegal ne'ebé fo ameadu ba soberania Nasaun, relasiona ho steitementu lideransa KRM no CPD-RDTL iha media nasional.

---

<sup>17</sup> Gari, Francisco. (2014, Maiu 09). Diretor Ejecutivo TLMDC. Diskusaun Peace Building Networking iha BELUN

<sup>18</sup> Viana, Rui. (2010, Febreiru 15). Kondisaun Direitu Umanus iha Covalima no Bobonaro. Relatoriu HAK. Bele asesu mos iha link ne'e; <http://www.laohamutuk.org/Justice/HAKHRCovaBoboFev10Te.pdf>

<sup>19</sup> Monteiro, Manuel. (2014, 09 Juñu). Diretor Ejecutivo HAK. Diskusaun Peace Building Networking iha NGO BELUN.



Ne'ebé husu atu desolve Parlamentu Nasional, demite Governu no halo suspensaun ba Konstituisaun RDTL.<sup>20</sup> Projetu rezolusaun ne'e aprova ho unanimidade ho rezultadu votasaun pasa ho votu 63, kontra 0 no abtensaun 0.<sup>21</sup>

Baze legal husi rezolusaun ne'ebé Parlamentu Nasional uza hodi kondena grupu KRM no CPD-RDTL maka Kodigu Penal artigu 202, artigu 188, artigu 194 no artigu 195. Nomos, Konstituisaun RDTL artigu 43 alinea 3 no artigu 146. Inklui Lei Organiku F-FDTL ne'ebé aprova iha Decreto-Lei nú 7/2004, iha 5 de Maiu, iha Lei Seguranga Nasional nian ne'ebé aprova iha Lei nú 02/2010, iha 21 Abril.<sup>22</sup> Iha ne'ebé Parlamentu Nasional nu'udar orgaun seberanu hodi representante povu iha poder konstituisional hodi halo fiskaliza no foti desizaun política ba situasaun siguransa iha rai-laran.<sup>23</sup>

Mosu hanoin pro-kontra kona-bá rezolusaun husi Parlamentu Nasional no Konsellu Ministru ne'e rasik. Konsidera rezolusaun ne'e inkonstitusional tanba atu deklarasaun estadu disitiu ka ermerjensia hodi hatún forsa armada no forsa polísia hodi halo operasaun nu'udar kompetensia Prezidenti Repúblika ne'ebé iha nia kualidade nu'udar Komandante Supremu Força Armada no Xefi Estadu. Inklui atu taka organizasaun ilegal, ne'e kompetensia Tribunal nian tuir lei haruka, la'os Parlamentu Nasional ka Governu nia kompetensia.<sup>24</sup>

Maibe Parlamentu Nasional maka halo deklarasaun liu husi rezolusaun no Governu halo ezekusaun.<sup>25</sup> Ida ne'e hatudu katak rezolusaun ne'e nakonu ho tendensia política no la'os ba interese komun nian.<sup>26</sup> Konsidera katak rezolusaun ne'e hanesan tribunal popular ida hodi kondena organizasaun hirak ne'e nia ejistensia nu'udar ameasa ba estabilidade nasional, maske ejijensia husi lideransa CPD-RDTL no KRM durante ne'e seidauk fo impaktu ba siguransa nasional.<sup>27</sup>

Nune'e mos ezijensia hirak ne'ebé mai husi lideransa KRM no CPD-RDTL kontinua iha koridor demokrasia nian, iha ne'ebé husu Prezidenti Repúblika uza nia kompetensia atu demite Governu relasiona ho lalaok governasaun atual nian, situasaun sosial no ekonómiku povu nian. Iha ne'ebé povu barak kontinua iha liña pobreza maske kada tinan alokasaun Osamentu Jeral Estadu – OJE aumenta bebeik maibe korupsaun mos buras iha governasaun ne'ebé la'os dadauk, ne'e sorin ida.<sup>28</sup>

---

<sup>20</sup> Parlamentu Nasional. (2014). Hodi repudia tentativas ba instabilidade no ameagas contra Estado de Direito.p1.

<sup>21</sup> Alm. (2014, Marsu 04). PN Aprova Rezolusaun, Kaptura Mauk Moruk. Media Diariu Nasional. <http://www.jndiario.com/2014/03/04/pn-aprova-rezolusaun-kaptura-mauk-moruk/>

<sup>22</sup> Parlamentu Nasional. (2014). Hodi repudia tentativas ba instabilidade no ameagas contra Estado de Direito.pdf.p2

<sup>23</sup> Konstituisaun RDTL. Artigu 92 Alinea 1.

<sup>24</sup> Oliveira, Jose. (2014, Abril 06). Direúr ONG AJAR. Entrevista Pesoal.

<sup>25</sup> Oliveira, Jose. (2014, Abril 06). Direúr ONG AJAR. Entrevista Pesoal.

<sup>26</sup> May. (2014, Maiu 08). FM Konsidera Rezolusaun PN Nakonu Ho "Game" Política. <http://opinitimor.blogspot.com/2014/05/fm-konsidera-rezolusaun-pn-nakonu-ho.html>

<sup>27</sup> Oliveira, Jose. (2014, Abril 06). Direúr ONG AJAR. Entrevista Pesoal.

<sup>28</sup> Beb. (2014, Marsu 24). Mauk Moruk Sadik Autor Justisa Sulan Koruptor. <http://timorexpose.tl/?p=1292>



Iha sorin seluk, la iha ona fatin ba sidadaun sira atu krítika buat ruma kuandu iha naksalak no buat hotu ho operasaun. CPD-RDTL eziste tinan sanulu resin ona tanbasa la atua nu'udar haktuir iha rezolusaun Parlamentu Nasional iha ne'ebé konsidera grupu ilegal?

Polítika “Operasaun 66” no “Operasaun Habelun” ne'ebé bazeia ba rezolusaun Parlamentu Nasional no Konsellu Ministru ne'e la'os tanba ameasa siguransa maibe nu'udar ameasa polítika entre lideransa tuan sira.<sup>29</sup> Portantu sei hakait ho problema pasadu rezistencia Timor-Leste nian ho figura importante sira no problema prezenti nian kona-bá situasaun sosial no ekonómiku povu nian.

### **Impaktu husi Rezolusaun: “Operasaun Habelun”**

Hafoin Konsellu Ministru – KM halo aprovasaun ba rezolusaun Nú. 08/2014 iha loron 31 fulan Marsu tinan 2014 hodi involve mos F-FDTL iha KOK atu atua hasoru KRM no CPD-RDTL ne'ebé seidak entregada an no atributu militar tuir rezolusaun Parlamentu Nasional - PN Nú. 05/3/2014. Iha ne'ebé Governu halo lansamentu “Operasaun Habelun” iha loron 09 fulan Abril tinan 2014.<sup>30</sup>

Objetivu husi “Operasaun Habelun” atu reestablese fila fali situasaun siguransa hafoin periodu implementasaun “Operasaun 66” hodi kaptura lideransa KRM no CPD-RDTL ne'ebé ezejuta husi PNTL hafoin liu loron rua Parlamentu Nasional halo aprovasaun.<sup>31</sup> Iha ne'ebé konsege hamosu rejistencia (tiru malu) entre membru KRM no CPD-RDTL ho instiuisaun PNTL ne'ebé konsege hakanek membru polísia ida husi Sub-Unidade Batallaun Orden Públiku - BOP, iha area Lalulai, Suku Samalari, Sub-Distritu Laga, Distritu Baucau.<sup>32</sup>

Rezultadu husi “Operasaun Habelun” ne'e la konsege reintegra comunidade hodi hakalma situasaun. Maibe aumenta presan halo comunidade pániku no trauma relasiona prezensa KOK ne'ebé kompletu ho atributu militar. Maske Komandu Jeral PNTL rasik deklarata katak KOK sei la uza forsa iha periodu operasaun.<sup>33</sup> Miabe comunidade hetan presan no agresan fiziku husi membru KOK durante ezejuta rezolusaun hodi halo atuasaan hasoru sira.<sup>34</sup> Iha ne'ebé konklui katak “Operasaun Habelun” lori dezastre ba siguransa públiku iha comunidade baze.

---

<sup>29</sup> Oliveira, Jose. (2014, Abril 06). Diretór ONG AJAR. Entrevista Pesoad.

<sup>30</sup> Tempo Semanal. (2014, Abril 10). Longuinhos Husu FDTL Ho PNTL Obriga Ema Kumpri Lei. <http://www.temposemanal.com/nasional/longuinhos-husu-fdtl-ho-pntl-obriga-ema-kumpri-lei>

<sup>31</sup> Redasaun STL. (2014, Marsu 05). PNTL Halo Atuasaan Ba Sede CPD-RDTL Balide. <http://jornal.suara-timor-lorosae.com/pntl-halo-atuasaan-ba-sede-cpd-rdtl-balide/>

<sup>32</sup> Res & May. (2014, Marsu 11). Operasaun Ba Baze KRM Ho CPD-RDTL Membru PNTL Ida Kanek Todan. Media Diariu Nasional. <http://www.jndiario.com/2014/03/11/operasaun-ba-baze-krm-ho-cpd-rdtl-membru-pntl-ida-kanek-todan/>

<sup>33</sup> Anibal, Joao. (2014, Marsu 04). PNTL Halao Operasaun Sei La Uza Forasa. <http://suara-timor-lorosae.com/pntl-halao-operasaun-sei-la-uza-forsa/>

<sup>34</sup> THD. (2014, Abril 24). Operasaun FDTL no PNTL hasoru CPD no KRM falha no populasaun sai vitima. <http://www.timorhauniandoben.com/2014/04/operasaun-fdtl-no-pntl-hasoru-cpd-no.htm>





a. Membru KRM no CPD-RDTL

Tarjetu husi “Operasaun Habelun” ne’e maka atu buka tuir no kaer membru KRM no CPD-RDTL ne’ebé ladauk entrega an to’o ohin loron inklui fardamentu militar nian. Ho tipu aprosimasaun polisiamentu komunitariu atu nune’e bele konvense comunidade hodi re-integra fila fali ba sociedade. Inklui mos atu buka tuir kilat ne’ebé deskonfia membru KRM no CPD-RDTL lori halai ba subar iha foho Matebian.<sup>35</sup>

Maibe, implementasaun husi operasaun ne’e sees husi atuasaun polisiamentu komunitaria, membru KOK hatudu brutalizmu hodi halo agresaun fiziku hasoru membru KRM no CPD-RDTL.<sup>36</sup> Nune’e mos KOK nia prezensa ne’ebé ho kompletu armamentu militar halo comunidade ne’ebé deskonfia membru KRM no CPD-RDTL balun halai sai husi uma hodi subar iha ai-laran nomos balun atu oho an tanba senti iha presaan no ameadu.<sup>37</sup>

FM nia monitorizasaun hetan katak membru CPD-RDTL no KRM Jacinto Ramos decide foti asaun hodi sona nia an wainhira membru KOK ne’ebé kompostu husi F-FDTL no PNTL halo serku ba ninia subar fatin, iha Suku Samalari, Sub-Distritu Baguia tanba senti iha presaan no aumenta ho problema pesoal ne’ebé nia infrenta durante involve iha grupu CPD-RDTL.<sup>38</sup> Iha ne’ebé públikasaun media katak nia oho-an tanba senti “stress” no halo an hanesan ema bulak.<sup>39</sup> Públikasaun ne’e mos konsidera la imparcial tanba jornalista hetan meius transporte husi KOK no husu media ajuda hakerek pontu pozitivu husi operasaun hodi kontribui ba política Estadu nian.<sup>40</sup>

Nomos familia ida husi Suku Osso-Huna (fen-la’en no oan) ne’ebé to’o ohin loron seidauk entrega an, senti tauk no trauma relasiona ho prezensa KOK.<sup>41</sup> Lider komunitariu iha kuinesementu kona-bá asuntu ne’e, no halo ona esforsu balun liu husi kampaña komunitaria atu nune’e bele fasilita prosesu re-integrasaun.<sup>42</sup>

Iha parte seluk membru KOK ne’ebé iha postu Sub-Distritu Baguia, Suku Osso-Huna halo agresaun fiziku hasoru Julio dos Reis ne’ebé nu’udar Komandante Seksaun CPD-RDTL Sede Namkari, hetan agresaun fizika no fai ho kilat, asaun seluk husi membru KOK maka tesi-nia

<sup>35</sup> May. (2014, Abril 03). Deskonfia Membrus KRM-CPD-RDTL Iha Kilat PR Taur Orienta Komando F-FDTL Buka Tuir. Media Diariu Nasional. <http://www.jndiario.com/2014/04/03/deskonfia-membrus-krm-cpd-rdtl-iha-kilat-pr-taur-orienta-komando-f-fdtl-buka-tuir/>

<sup>36</sup> Fundasaun Mahein. (2014, Maiu 16). OPERASAUN KONJUNTA: Habelun ka Hatauk?. <http://www.fundasaunmahein.org/2014/05/16/operasaun-konjunta-habelun-ka-hatauk/>

<sup>37</sup> Rezultadu monitoring husi ekipa Fundasaun Mahein durante semana ida iha Distritu Baucau, partikular Sub-Distritu Laga, Baguia no Quilecai.

<sup>38</sup> Informasaun ne’e Fundasaun Mahein rekoilla durante halo monitorizaun iha fatin akontesementu iha loron 07 fulan Maiu 2014.

<sup>39</sup> MJ6. (2014, Abril 23). Membru CPD-RDTL-CRM Sona An iha Baguia. Media STL. <http://jornal.suara-timor-lorosae.com/membru-cpd-rdtl-crm-sona-an-iha-baguia/>

<sup>40</sup> Gari, Francisco. (2014, Abril 09). Diretor Ezekutivu TLMDC. Diskusaun Peace Building Networking iha ONG BELUN.

<sup>41</sup> Dos Reis, Julio. (2014, Maiu 07). Komandante CPD-RDTL Seksaun Sede Namkari. Entrevista Pesoal.

<sup>42</sup> Aparicio Guterres, Antonio. (2014, Maiu 07). Xefi Suku Ossu-Huna – Baguia. Entrevista Pesoal.

fuuk ho baioneta(*sangkur*) wainhira kaptura iha nia rezidencia, iha loron 16 Abril 2014.<sup>43</sup> Aktu tratamentu aat ne'e rekuiñese husi lideransa komunitariu Suku Ossu-Huna.<sup>44</sup>

### Vitima husi Membru CPD-RDTL iha Suku Ossu-Huna - Baguia



Fontes: Foto FM, 2014.

Kazu agresaun fiziku ne'ebé hanesan mos aplika husi membru KOK iha postu operasaun Laculiu – Quilecai hasoru Adelino Soares "Laukasa'a" nu'udar lideransa masimu CPD-RDTL iha Sede Katikarsu – Lelalai, Sub-Distritu Quilecai ne'ebé ran sai husi inus no mate besik oras ida durante hetan baku iha eskuadra PNTL Quilecai.<sup>45</sup>

### Vitima Membru CPD-RDTL iha Lelalai - Quilecai



Fontes: Foto FM, 2014.

<sup>43</sup> Dos Reis, Julio. (2014, Maiu 07). Komandante CPD-RDTL Seksaun Sede Namkari. Entrevista Pesoal.

<sup>44</sup> Aparicio Guterres, Antonio. (2014, Maiu 07). Xefi Suku Ossu-Huna – Baguia. Entrevista Pesoal.

<sup>45</sup> Soares, Adelino. (2014, Maiu 08) Sekretariu Zona CPD-RDTL Sub-Regiaun Ketikarsu. Entrevista Pesoal



Presan no persegisaun husi membru KOK la'os deit hasoru pesoal ne'ebé ativu iha organizasaun KRM no CPD-RDTL, familia mos sai fali trajetu ba KOK hodi baku no insulta durante iha prosesu operasaun.<sup>46</sup> Relasiona ho atuasaun membru KOK ne'ebé ho milíteristiku, membru KRM no CPD-RDTL ne'ebé sai vitima husu atu lori sira nia kazu ba prosesu iha tribunal hodi nune'e sira bele hetan justisa.<sup>47</sup>

Tanba Parlamentu Nasional no Konsellu Ministru kondena ho rezolusaun nu'udar organizasaun ilegal hodi halo kapturasaun hasoru sira maibe ladauk lori ba tribunal hodi prosesa tuir lei, sira ho hetan deit inkeretu ne'ebé iha postu operasaun KOK nian hodi insulta no koalia liafuan aat ba sira durante prosesu investigasaun.<sup>48</sup> Ida ne'e hatudu katak KOK halo julagamentu iha fatin akontesementu, lolos KOK halo kapturasaun, investiga no prosesu tuir dalan justisa maka iha tribunal tuir rezolusaun haruka.

Razaun fundamental ida husi comunidade ne'ebé involve iha grupu KRM no CPD-RDTL tanba sira hare iha diskriminasaun husi Estadu ba sira nia partisipasaun iha funu nu'udar veteranus no seidak iha rekuiñesementu ida ne'ebé los iha prosesu sira ne'e.<sup>49</sup>

b. Veteranus no militante partidu politiku

Tarjetu husi rezolusaun Parlamentu Nasional Nú. 05/3/2014 no Konsellu Ministru Nú. 08/2014 maka atu atua grupu ilegal KRM no CPD-RDTL. Maibe iha implementasaun husi rezolusaun ne'e ses husi saida maka mensiona iha rezolusaun. Iha ne'ebé durante ezejuta rezolusaun ne'e veteranus no militante partidu polítika balun sai vitima maske Asosiasaun Veteranus no Partidu Polítik nu'udar organizasaun legal tuir lei inan.<sup>50</sup>

Relatoriu ne'ebé FM simu durante operasaun hetan lamentasaun husi organizasaun veteranus sira ne'ebé kestiona operasaun atua sai husi koridor rezolusaun nian (la tuir rezolusaun) tanba halo atuasaun hasoru membru veteranus no militante partidu politiku inosente sira. Iha ne'ebé Asosiasaun Antigo Kombatente no Veteranus das FALINTIL – AACVF) lidera husi Bernardo de Oliveira “Maukiak Lemorai” hato'o sira nia ejijensia ho Karta Nú. 03/AACVF/IV/2014 ba Ministeriu Públiku kona-bá atuasaun membru KOK hasoru nia membru iha Distritu Baucau, Viqueque, Aileu no Ermera.<sup>51</sup>

Kazu hanesan akontese iha Distritu Viqueque, Sub-Distritu Uatucarbau ne'ebé deskonfia atuasaun polisia nian hasoru membru AACVF relasiona ho odiu pasadu ne'ebé aproveita

<sup>46</sup> THD. (2014, Abril 24). Operasaun FDTL no PNTL hasoru CPD no KRM falha no populasaun sai vitima. <http://www.timorhauniandoben.com/2014/04/operasaun-fdtl-no-pntl-hasoru-cpd-no.html>

<sup>47</sup> Dos Reis, Julio. (2014, Maiu 07). Komandante CPD-RDTL Seksaun Sede Namkari. Entrevista Pesoal.

<sup>48</sup> THD. (2014, Abril 24). Operasaun FDTL no PNTL hasoru CPD no KRM falha no populasaun sai vitima. <http://www.timorhauniandoben.com/2014/04/operasaun-fdtl-no-pntl-hasoru-cpd-no.html>

<sup>49</sup> Informasaun hanaesan ne'e kuaze ekipa FM hasoru no rona husi membru KRM no CPD-RDTL durante halo monitorizasaun, hanesan iha Lelalai-Quilecai, Osso-Huna-Baguaia, Lalulai-Laga.

<sup>50</sup> Konstituisaun RDTL. Direitu ba Partisipasaun iha Vida Polítika. Artigu 46 Alinea 1-3.

<sup>51</sup> de Oliveira, Bernardo. (2014, Abril 20). Prezidenti AACVF. Dokumentu ba keisa husi vitima sira.

situasaun operasaun hodi sobu sira nia sede. Involve direta husi lideransa komunitariu balu no polisia halo presaan no insulta inklui hasai sira forsadamente husi sira nia sede. Nune'e mos iha Distritu Baucau, liu-liu iha Sub-Distritu Baguia, Suku Hae-Coni no Ossu-Huna lideransa komunitaria hamutuk ho KOK hodi obriga comunidade deklarara an sai husi grupu KRM no CPD-RDTL, maske comunidade balun la involve iha grupu refere.<sup>52</sup>

### Vitima Militante Partidu Politiku



Fontes: Foto Especial, 2014.

Kazu hanesan mos akontese iha Distritu Manatuto, Alieu no Likisa ne'ebé membru veteranu balun sai vitima husi operasaun ne'e. Iha ne'ebé atuasaun lideransa komunitaria ho KOK hasoru veteranu sira, relasiona ho problema privadu entre sira, la'os tuir regra ka prosedura ne'ebé mensiona iha rezolusaun. Kestaun hirak ne'e sai atensaun husi organizasaun registensia sira hodi hato'o keisa ba Prezidenti Repúblika kona-bá situasaun operasaun ne'ebé nakonu ho atuasaun militeristiku.<sup>53</sup>

Iha parte seluk militante partidu balun mos sai alvu ba operasaun KOK nian. Hanesan akontese iha Suku Uaimori-Tula, Distritu Viqueque ne'ebé militante Partidu FRETILIN kuaze ema na'in 10 sai vitima husi atuasaun membru KOK. Iha ne'ebé kazu ne'e lori to'o iha Parlamentu Nasional tanba sira senti trauma no la seguru.<sup>54</sup> Nune'e mos membru KOK silu tohar riin bandeira FRETILIN nian no halo agresaun fiziku (baku) militante partidu ne'ebé sira deskonfia nu'udar membru KRM no CDP-RDTL.<sup>55</sup>

<sup>52</sup> de Oliveira, Bernardo. (2014, Abril 20). Prezidenti AACVF. Dokumentu ba keisa husi vitima sira.

<sup>53</sup> Tempo Semnal. (2014, Juñu 13). Representante Eis Resistensia Keixa PNTL ba TMR. [http://www.temposemanal.com/seguransa-defesa/representante-eis-resistencia-keixa-pntl-ba-tmr#\\_U529bD7KH\\_o.facebook](http://www.temposemanal.com/seguransa-defesa/representante-eis-resistencia-keixa-pntl-ba-tmr#_U529bD7KH_o.facebook)

<sup>54</sup> Tempo Semanal. (2014, Maiu 30). Militantes Fretilin Sai Vítima Operasaun Konjunta. <http://www.temposemanal.com/vikeke/militantes-fretilin-sai-vitima-operasaun-konjunta>

<sup>55</sup> Ximenes, Carme. (2014, Maiu 06). PNTL Viqueque Silu Tohar Rin Bandeira Fretilin, PN Prontu konfirma iha Terenu. Media STL. <http://jornal.suara-timor-lorosae.com/pntl-viqueque-silu-tohar-rin-bandeira-fretilin-pn-prontu-konfirma-iha-terenu/>



Kazu hanesan mos akontese iha Suku Lelalai, Sub-Distritu Quelecai ne'ebé membru KOK halo kapturasaun ba Mario S. Boavida nu'udar militante Partidu FRETILIN, iha ne'ebé hetan agresaun fíziku no halo presau pisikolojiku.<sup>56</sup> Akontesementu seluk iha distritu Aileu ne'ebé membru KOK halo atusaun arbiru durante operasaun no kaptura militante Partidu ASDT no estraga bandeira partidu nian inklui sasan seluk ne'ebé iha relasaun ho partidu nian.<sup>57</sup>

c. Komunidade (feto no labarik sira)

Rezultadu husi operasaun KOK ne'e mos fo impaktu ba komunidade bai-bain, labarik sira inklui inan-feto sira iha area rural, partikularmente iha area operasaun KOK. Hanesan iha Sub-Distritu Laga, Baguia no Quilecai. Relasiona prezensa KOK ne'ebé uniforme armadu ho kilat boot. Inklui mos ho atusaun milíteristiku ne'ebé membru KOK halo durante operasaun sai nu'udar ameasa ida ba sira.<sup>58</sup>

Kazu hanesan inan-feton ida ho nia oan iha Suku Lalulai, Sub-Distritu Quilecai senti trauma ho atusaun membru KOK hasoru membru KRM no CPD-RDTL ho forsadamente hodi tuku no tebe wanhira halo kapturasaun. Hanesan inan-feton Alexandrina da Costa ho nia oan na'in rua senti trauma wainhira KOK halo kapturasaun ba nia la'en ho aktu milíteristiku hodi baku no tebe, soe ba iha kareta laran ne'ebé to'o ran-sai husi ibun.<sup>59</sup>

Nune'e mos kazu hanesan akontese iha area operasaun Sub-Distritu Laga nian ne'ebé membru KOK halo presau no duun inan-feton (ferik) hakoi kilat no granada iha uma laran, hodi haruka ferik ne'e ke'e rai, realidade kilat no granada laiha. Membru KOK baku ho kilat ba ninia bei-oan durante ke'e rai kuak ne'ebé deskonfia hakoi kilat no granada iha laran.<sup>60</sup> Hahalok ida ne'e, vitima hato'o ona keisa ba Gabinetei Prezidencia Repúblika hodi informa kona-bá brutalizmu membru KOK durante operasaun.<sup>61</sup>

---

<sup>56</sup> Boavida, Mario. (2014, Maiu 08). Militante Fretilin husi Suku Lelalai-Sub-Distritu Lelalai. Entrevista Pesal.

<sup>57</sup> de Oliveira, Bernardo. (2014, Abril 20). Prezidenti AACVF. Dokumentu ba keisa husi vitima sira.

<sup>58</sup> THD. (2014, Abril 24). Operasaun FDTL no PNTL hasoru CPD no KRM falha no populasau sai vitima. <http://www.timorhauniandoben.com/2014/04/operasaun-fdtl-no-pntl-hasoru-cpd-no.html>

<sup>59</sup> Nia esklarese ba FM durante halo entrevista ho nian, inklui nia laen ne'ebé hetan agresaun fiziku husi membru KOK.

<sup>60</sup> THD. (2014, Abril 24). Operasaun FDTL no PNTL hasoru CPD no KRM falha no populasau sai vitima. <http://www.timorhauniandoben.com/2014/04/operasaun-fdtl-no-pntl-hasoru-cpd-no.html>

<sup>61</sup> THD. (2014, Maiu 07). Vitima PNTL no F-FDTL nian hasoru assessor Prezidente Repúblika hodi informa brutalidade sira enfrenta. <http://www.timorhauniandoben.com/2014/05/vitima-pntl-no-f-fdtl-nian-hasoru.html>

## Vitima Feto husi KOK



**Fontes:** Foto Espesial, 2014.

Durante monitorizasaun FM indentifika mos maioria comunidade ne'ebé hela iha area operasaun hanesan, Sub-Distritu Laga, Baguia no Quilecai tauk fo informasaun kona-bá operasaun nian. Iha Aldeia Lalulai, Suku Samalari comunidade sira senti la seguru hodi fo informasaun ba ema seluk, relasiona ho membru KOK lori kilat-boot la'ó ba mai iha estrada no bairo comunidade nian.<sup>62</sup> Nune'e mos comunidade husi Suku Sagadate ne'ebé baliza ho aldeia Lalulai (baze KRM no CPD-RDTL) senti tauk atu la'ó dook husi sira nia uma tanba prezensa KOK maske sira la'os membru husi grupu KRM no CPD-RDTL.<sup>63</sup>

Hare'e husi preoukupasaun comunidade sira kona-bá prezensa KOK no nia atuasaun ne'ebé brutal hatudu katak "Operasaun Habelun" la susesu atu re-integra comunidade. Halo comunidade inosente sai vitima ba operasaun ne'e rasik. FM konsidera operasaun ne'e hanesan projetu ida. Iha ne'ebé mosu dezentendementu entre membru KOK kona-bá pagamentu "Osan Operasaun" durante operasaun nia laran.<sup>64</sup>

### Konkluzaan

Husi relatoriu ne'e konklui katak rezolusaun rua ne'ebé Parlalmentu Nasional no Konsellu Ministru hasai iha ne'ebé sai tutun no implementa maka "Operasaun 66" no Operasaun Habelun" la susesu no hamosu situasaun siguransa iha baze sai la seguru liu tan, comunidade sente presaan maka'as ho prezensa KOK nian iha baze. Inklui kilat hirak ne'ebé deskonfia membru KRM no CPD-RDTL subar la konsege rekolla portantu informasaun hirak ne'e bazeia

<sup>62</sup> Fundasaun Mahein nia observasaun direta iha aldeia Lalulai ne'ebé sai nu'udar baze ba grupu KRM no CPD-RDTL.

<sup>63</sup> Pereira, Jose. (2014, Maiu 07). Komunitade bai-bain husi Suku Sagadate. Entrevista Pesoal.

<sup>64</sup> Tempo Semanal. (2014, Marsu 28). Estadu Selu PNTL Lalulai Hamosu Tensaun Entre PNTL Baukau. <http://www.temposemanal.com/seguransa-defesa/estadu-selu-pntl-lalulai-hamosu-tensaun-entre-pntl-baukau>



ba rumoris no la iha dadus intelejensia ida ne'ebé kredível. Ironiku liu tan komidade inosente sai vitima iha operasaun ne'e no operasaun sai husi buat ne'ebé rezolusaun haruka.

Reintegrasaun membru KRM no CPD-RDTL la konsege reintegra komidade ne'ebé deskonfia involve iha grupu KRM no CPD-RDTL ba sosiedade. Portantu reintegrasaun komunitaria la'os ho dalan operasaun forsa armada no forsa polisia maibe reintegra ho dalan pasifiku no dialogu. Presiza iha tratamentu ida integradu husi Governu husi aspetu oin-oin ba problema ne'ebé kompleksu, tantu problema sosial, ekonómiku no veteranus nian.

Ikus liu, iha kontiudu rezolusaun ne'ebé hasai konsidera nu'udar ameasa ba estabilidade nasional no soberania Estadu nian maibe operasaun ne'e rasik hanesan jogu politiku ne'ebé iha ligasaun ho problema pasadu tempu funu nian no entre figura lideransa nasional sira. Iha ne'ebé FM konsidera katak polítika rezolusaun no establesementu KOK liu husi "Operasaun Habelun" ne'e konsidera nu'udar amaesa polítika la'os ameasa siguransa.

### **Rekomendasaun**

1. Rekomenda ba Prezidenti Repúblika nu'udar simbolu unidade nasional presiza kria dialogu komunitaria ida ho komidade vitima sira no komidade ne'ebé deskonfia involve iha grupu KRM no CPD-RDTL ho koordinasaun Governu atu reintegra komidade ho pasifiku no integradu. Portantu operasaun la'os solusaun ne'ebé pasifiku no habelun ho komidade.
2. Rekomenda ba Parlamentu Nasional atu bolu Ministériu Defeza no Siguransa hodi esklarese ba públiku kona-bá rezultadu husi operasaun KOK hasoru grupu KRM no CPD-RDTLto'o iha ne'ebe no oinsa ninia solusaun.
3. Rekomenda ba Governu atu tau atensaun ba asuntu veteranus nian hodi rezlove problema sira ne'ebé iha, kona-bá rekuinesementu Estadu nian ba partisipasaun povu nian iha tempu funu ho justu.



## Bibliografia

- Anibal, Joao. (2014, Maiu 09). Operasaun Lao Susesu, Maske Seidauk Kaer Ema Lori Kilat. <http://jornal.suara-timor-lorosae.com/operasaun-lao-susesu-maske-seidauk-kaer-ema-lori-kilat/>
- Anibal, Joao. (2014, Marsu 04). PNTL Halao Operasaun Sei La Uza Forsa. <http://suara-timor-lorosae.com/pntl-halao-operasaun-sei-la-uza-forsa/>
- Alm. (2014, Marsu 04). PN Aprova Rezolusaun, Kaptura Mauk Moruk. Media Diariu Nasional. <http://www.jndiario.com/2014/03/04/pn-aprova-rezolusaun-kaptura-mauk-moruk/>
- Agi. (2008, Marsu 14). Barisan depan Operasi Salsinha Lolos Dari Kepungan 460 Pasukan KOG. Media STL. <http://groups.yahoo.com/neo/groups/east-timor-studies/conversations/topics/16037>
- Aparicio Guterres, Antonio. (2014, Maiu 07). Xefi Suku Ossu-Huna – Baguia. Entrevista Pessoal.
- Beb. (2014, Marsu 24). Mauk Moruk Sadik Autor Justisa Sulan Koruptor. <http://timorexpose.tl/?p=1292>
- Boavida, Mario. (2014, Maiu 08). Militante FRETILIN husi Suku Lelalai-Sub-Distritu Quelicai. Entrevista Pessoal.
- Dos Reis, Julio. (2014, Maiu 07). Komandante CPD-RDTL Seksaun Sede Namkari. Entrevista Pessoal.
- de Oliveira, Bernardo. (2014, Abril 20). Prezidenti AACVF. Entrevista Pessoal
- Fundasaun Mahein. (2014, Maiu 16). OPERASAUN KONJUNTA: Habelun ka Hatauk?. <http://www.fundasaunmahein.org/2014/05/16/operasaun-konjunta-habelun-ka-hatauk/>
- Fundasaun Mahein. (2010, Agostu 10). [Saida Mak Operasaun Ualu-Ualu \(88\)?](http://fundasaunmahein.wordpress.com/2011/08/10/saida-mak-operasaun-ualu-ualu-88/). <http://fundasaunmahein.wordpress.com/2011/08/10/saida-mak-operasaun-ualu-ualu-88/>
- Gari, Francisco. (2014, Maiu 09). Diretor Ezekutivu TLMDC. Diskusaun Peace Building Networking iha BELUN
- Konstituisaun RDTL
- Lariwa. (2011, Maiu 2011). FM Kritika Politika Operasaun PNTL. <http://cjitnoticias.sapo.tl/nasional/fm-kritika-politika-operasaun--81707>
- May. (2014, Maiu 08). FM Konsidera Rezolusaun PN Nakonu Ho “Game” Politika. Media Diariu Nasional. Bele asesu mos iha link ne’e; <http://opinitimor.blogspot.com/2014/05/fm-konsidera-rezolusaun-pn-nakonu-ho.html>
- May. (2014, Abril 25). Grupu CPD-RDTL 69 Entrega A’an Ba KOK. Media Diariu Nasional. <http://www.jndiario.com/2014/04/25/grupu-cpd-rdtl-69-entrega-aan-ba-kok/>





- May. (2014, Abril 03). Deskonfia Membrus KRM-CPD-RDTL Iha Kilat PR Taur Orienta Komando F-FDTL Buka Tuir. Media Diariu Nasional. <http://www.jndiario.com/2014/04/03/deskonfia-membrus-krm-cpd-rdtl-ih-kilat-pr-taur-orienta-komando-f-fdtl-buka-tuir/>
- Moniz, Armandina & Ximenes, Lucia. (2014, Marsu 11). Operasaun ba CRM ho CPD-RDTL iha Laga, Membru PNTL 2 Kanek. <http://jornal.suara-timor-lorosae.com/operasaun-ba-crm-ho-cpd-rdtl-ih-laga-membru-pntl-2-kanek/>
- Monteiro, Manuel. (2014, 09 Juñu). Diretur Ezekutivu HAK. Diskusaun Peace Building Networking iha NGO BELUN
- MJ6. (2014, Abril 23). Membru CPD-RDTL-CRM Sona An iha Baguia. Media STL. <http://jornal.suara-timor-lorosae.com/membru-cpd-rdtl-crm-sona-an-ih-baguia/>
- Oliveira, Jose. (2014, Abril 06). Diretúr Ezekutivu ONG AJAR. Entrevista Pesoal.
- Parlamentu Nasional. (2014). Hodi repudia tentativas ba instabilidade no ameagas contra Estado de Direito.
- Pereira, Jose. (2014, Maiu 07). Komunidade bai-bain husi Suku Sagadate. Entrevista Pesoal.
- Redasaun STL. (2014, Marsu 05). PNTL Halo Atuasaun Ba Sede CPD-RDTL Balide. <http://jornal.suara-timor-lorosae.com/pntl-halo-atuasaun-ba-sede-cpd-rdtl-balide/>
- Res & May. (2014, Marsu 11). Operasaun Ba Baze KRM Ho CPD-RDTL Membru PNTL Ida Kanek Todan. Media Diariu Nasional. <http://www.jndiario.com/2014/03/11/operasaun-ba-baze-krm-ho-cpd-rdtl-membru-pntl-ida-kanek-todan/>
- Soares, Adelino. (2014, Maiu 08) Sekretariu Zona CPD-RDTL Sub-Regiaun Ketikarso. Entrevista Pesoal
- Sequiera, J & Santos, J. (2014, Abril 23). Husi Operasaun Konjunta ba CRM no CPD-RDTL, Fongtil Husu PNTL no F-FDTL Hatudu Nafatin Profesionalismu. <http://jornal.suara-timor-lorosae.com/husi-operasaun-konjunta-ba-crm-no-cpd-rdtl-fongtil-husu-pntl-no-f-fdtl-hatudu-nafatin-profesionalismu/>
- Tempo Semanal. (2014, Abril 02). Lere Husu KRM Lalika Uza Kilat A'at Koko F-FDTL. <http://www.temposemanal.com/seguransa-defesa/ler-husu-krm-lalika-uz-kilat-a-at-koko-f-fdtl>
- Tempo Semanal. (2014, Abril 10). Longuinhos Husu FDTL Ho PNTL Obriga Ema Kumpri Lei. <http://www.temposemanal.com/nasional/longuinhos-husu-fdtl-ho-pntl-obriga-ema-kumpri-lei>
- Tempo Semanal. (2014, Abril 04). Operasaun 66 Susesu Hapara Grupu Ilegais. <http://www.temposemanal.com/seguransa-defesa/operasaun-66-susesu-hapara-grupu-ilegais>



- Tempo Semanal. (2014, Maiu 30). Militantes Fretilin Sai Vítima Operasaun Konjunta. <http://www.temposemanal.com/vikeke/militantes-fretilin-sai-vitima-operasaun-konjunta>
- Tempo Semanal. (2014, Marsu 28). Estadu Selu PNTL Lalulai Hamosu Tensaun Entre PNTL Baukau. <http://www.temposemanal.com/seguransa-defesa/estadu-selu-pntl-lalulai-hamosu-tensaun-entre-pntl-baukau>
- THD. (2014, Abril 24). Operasaun FDTL no PNTL hasoru CPD no KRM falha no populasaun sai vitima. <http://www.timorhauniandoben.com/2014/04/operasaun-fdtl-no-pntl-hasoru-cpd-no.html>
- THD. (2014, Maiu 07). Vitima PNTL no F-FDTL nian hasoru assessor Prezidente Repúblika hodi informa brutalidade sira enfrenta. <http://www.timorhauniandoben.com/2014/05/vitima-pntl-no-f-fdtl-nian-hasoru.html>
- Viana, Rui. (2010, Febreiru 15). Kondisaun Direitu Umanus iha Covalima no Bobonaro. Relatoriu HAK. Bele asesu mos iha link ne'e; <http://www.laohamutuk.org/Justice/HAKHRCovaBoboFev10Te.pdf>
- Ximenes, Carme. (2014, Maiu 06). PNTL Viqueque Silu Tohar Rin Bandeira Fretilin, PN Prontu konfirma iha Terenu. Media STL. <http://jornal.suara-timor-lorosae.com/pntl-viqueque-silu-tohar-rin-bandeira-fretilin-pn-prontu-konfirma-iha-terenu/>